



THE END

(Ili kako je bolji užasan kraj nego užas bez kraja...)

Stanje u ovoj našoj Bosni i Hercegovini već je odavno počelo ličiti na *Cirkus Monty Paytona*, što će reći da se svo vrijeme pitate ko je udareniji, izvođači ili gledaoci. A poteško je i ocijeniti ko je ko u ovoj našoj zavrzlamu.... Istini za volju, kao što sam nekoliko puta već govorila na ovom mjestu, ludilo u kojem živimo nije, nažalost i to veliku rekla bih, naš specijalitet, već je očito pravilo ovog našeg vremena. Naprimjer, bivši premijer Italije je nepravomoćno osuđen na četiri godine zatvora, bivši predsjednik Francuske je pod istragom, saslušava se direktorica *MMF*, a zbog navodne zloupotrebe javnih fondova, itd.itd...Pa se vi čudite što ovi naši neće s vlasti. Ali i mi smo se napeli, kao i svaka žaba jel', pa smo uhapsili predsjednika Federacije BiH. Jeste da je to samo predsjednik entiteta, ali mora se od nečega početi...

Plus, upravo vidim da drug Superhik najavljuje organizaciju masovnih sindikalnih protesta. Jer, ima da tražimo da se, pod hitno, podijele plaće svim radnicima, sa čime se i ja apsolutno slažem. S dotičnim drugom se razilazim doduše u definiciji radnika. Prema mome mišljenju, to bi trebao biti neko ko radi. Prema njegovom, - onaj ko (uglavnom) dolazi na posao. O produktivnosti neću ni pričati jer sam poprilično sigurna da je dotični ili pobjegao s časa kada se to učilo ili je bio mahmuran pa se ne sjeća.. Ukratko, prodaju se ublehe, još uvijek...

Ali, u svakom zlu ima nešto dobro, kao što i u svakom ludilu ima nekog sistema, pa naletim prije nekoliko dana na vrlo važnu osobu tzv. međunarodne zajednice. Ukratko, dotični me u povjerenju obavijestio da je odlučeno, na relaciji Washington-Brisel, da se, citiram: "Bosna "radi" iduće godine, s tim što pripreme počinju ove".

Razlog - procijenjeno je da ovakvi kakvi smo „predstavljamo kredibilnu prijetnju regionalnoj sigurnosti".

Znajući dotičnog gospodina i njegovu poziciju u Wa..., pardon međunarodnoj zajednici, mogu vam reći da sam baš obradovana pa kako god na kraju ispalo. Jer, kako rekoh na početku, bolje i užasan kraj nego užas bez kraja.... **E**

Aida Delić,
glavna i odgovorna urednica